

N A C R T

Na osnovu člana 14, člana 15. i člana 89. stav (1) Zakona o električnoj energiji („Službene novine Federacije BiH“ broj 41/02, 24/05, 38/05 i 61/09), člana 5. i člana 6. Statuta Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 13/04) i člana 52. stava (2) Poslovnika o radu Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 59/04), Regulatorna komisija za električnu energiju u Federaciji Bosne i Hercegovine - FERK je na IV. redovnoj sjednici održanoj u Mostaru dana 16.03.2010.godine donijela

P R A V I L N I K **o izmjenama i dopunama** **Pravilnika za tarifnu metodologiju i tarifne postupke**

Član 1.

U Pravilniku za tarifnu metodologiju i tarifne postupke („Službene novine Federacije BiH“ broj 45/05), član 10. stav (3) mijenja se i glasi:

„(3) Elektroprivredna društva u postupku podnošenja zahtjeva za pokretanje tarifnog postupka za djelatnosti: proizvodnje, distribucije i snabdijevanja I reda, dostavljaju FERK-u potrebnu dokumentaciju prema Pravilniku o izvještavanju.“

Član 2.

U Pravilniku za tarifnu metodologiju i tarifne postupke, naziv dijela tri „DIO TREĆI – VOĐENJE TARIFNOG POSTUPKA“ mijenja se i glasi „DIO TREĆI-TARIFNI POSTUPAK“.

Član 3.

U Pravilniku za tarifnu metodologiju i tarifne postupke, u dijelu tri „DIO TREĆI-TARIFNI POSTUPAK“ dodaje se član koji glasi:

„Član 51a.
(Opće odredbe)

FERK propisuje osnove pokretanja i vođenja tarifnog postupka koji su neophodni da FERK ispuni svoje obaveze u skladu sa Zakonom i Poslovníkom o radu FERK-a.“

Član 4.

Član 52. mijenja se i glasi:

„Član 52.
(Početak tarifnog postupka)

- (1) Tarifni postupak se pokreće podnošenjem zahtjeva FERK-u od regulisanog elektroprivrednog društva ili na inicijativu FERK-a.
- (2) FERK razmatra zahtjev za pokretanje tarifnog postupka samo ukoliko je zahtjev kompletan i sadrži dokaze navedene u stavu 5. ovog člana.
- (3) Ako podnosilac zahtjeva obavlja više elektroprivrednih djelatnosti, dužan je podnijeti zahtjev za pokretanje tarifnog postupka za svaku djelatnost za koju traži promjenu tarifa.
- (4) Nakon što je primljeni zahtjev pregledan, FERK određuje da li je primljeni zahtjev kompletan. FERK šalje pismeno obavještenje podnosiocu zahtjeva o kompletnosti zahtjeva u roku od 30 dana od dana prijema zahtjeva.
- (5) Zahtjev je kompletan kada su uz zahtjev podneseni svi traženi dokumenti, uplaćena jednokratna naknada za obradu zahtjeva i kada je podnosilac zahtjeva dao izjavu pod punom krivičnom i materijalnom odgovornošću da su svi podaci koji su u postupku rješavanja zahtjeva prezentirani pred FERK-om, istiniti i tačni.
- (6) Pregled potrebnih dokumenta koje treba dostaviti uz zahtjev sadržan je u Pravilniku o izvještavanju.
- (7) Ukoliko je podnosilac zahtjeva u skladu sa Pravilnikom o izvještavanju prethodno podnio FERK-u bilo koju dokumentaciju i propisane obrazce za baznu godinu, uz zahtjev podnosi potvrdu FERK-a o prijemu dokumenta.
- (8) FERK neće razmatrati zahtjeve za pokretanje tarifnog postupka koji se odnose na tarifni period koji je prethodnom odlukom FERK-a utvrđen kao vrijeme nepromjenljivosti tarife.
- (9) Teret dokazivanja u tarifnom postupku je na podnosiocu zahtjeva.“

Član 5.

Član 53. mijenja se i glasi:

„Član 53.
(Sadržaj zahtjeva za pokretanje tarifnog postupka)

- (1) Zahtjev i prilozi uz zahtjev za pokretanje tarifnog postupka moraju biti sačinjeni tako da omogućavaju identifikaciju kako slijedi:
 - a) naziva elektroprivrednog društva, djelatnost za koju se podnosi zahtjev, naziv, broj i datum dostavljene dokumentacije i obrazaca, da bi se odredili troškovi, rashodi, prihodi, zahtijevane tarife ili usluge i bilo koje druge stavke u svezi s podnošenjem dokumentacije, da bi se mogli locirati, potpis ovlaštenog predstavnika regulisanog elektroprivrednog društva,
 - b) zahtijevani dan stupanja na snagu predloženih tarifnih stavova

- (2) Uz zahtjev za pokretanje tarifnog postupka koji je pripremljen u skladu sa stavom (1) ovog člana prilažu se i dokumenti koji moraju sadržavati očekivan uticaj predložene tarife na kategorije i grupe potrošnje..
- (3) Svaki zahtjev za pokretanje tarifnog postupka mora uključivati dokumente i podatke navedene u Pravilniku o izvještavanju i bilo koje druge informacije vezane za predloženi potreban prihod i tarifne stavove.

Član 6.

U članu 54. stav (1) riječ „tarife“ zamjenjuje se riječima „pokretanje tarifnog postupka“, a iza riječi „obavještenja o“ dodaje se riječ „podnesenom“.

Član 7.

U članu 54. stav (2) mijenja se i glasi:

- „ (2) Obavještenje mora sadržavati:
- a) iznose zahtjevanih potrebnih prihoda po djelatnostima,
 - b) iznos predložene promjene tarife
 - c) prijedlog tarifnih stavova za svaku grupu i kategoriju potrošnje,
 - d) procenat predložene promjene tarife za svaku kategoriju kupaca,
 - e) predloženi dan stupanja na snagu izmjenjenih tarifnih stavova,
 - f) pravo kupca u traženju informacije u vezi sa sadašnjom i zahtjevanom tarifom, odnosno predloženim tarifnim stavovima.
 - g) pravo kupca na učestvovanje u otvorenoj i korektnoj raspravi pred FERK-om.“

Član 8.

U članu 54. stav (3) iza riječi „zahtjev“ dodaju se riječi „za pokretanje tarifnog postupka“.

Član 9.

Član 55. mijenja se i glasi:

„Član 55.
(Vođenje tarifnog postupka)

FERK vodi tarifni postupak i odlučuje na način utvrđen ovim Pravilnikom, Poslovnikom o radu i Pravilnikom o javnim raspravama i rješavanju zahtjeva i žalbi FERK-a.“

Član 10.

Član 57. mijenja se i glasi:

„Član 57.
(Regulatorni kontni plan)

Za potrebe primjene ovog pravilnika, elektroprivredna društva su dužna evidentirati u svojim poslovnim knjigama sredstva, izvore sredstva, troškove, prihode i rashode u skladu sa Regulatornim kontnim planom.“

Član 11.

Iza člana 58. dodaje se član koji glasi:

„Član 58. a.
(Donošenje rješenja)

- (1) Nakon formalne rasprave, FERK razmatra izvještaj voditelja postupka kao i komentare koje su strane u postupku dostavile na izvještaj, zasnivajući svoju odluku na činjenicama i dokazima iz pisanog izvještaja, komentarima strana u postupku, te na osnovu savjesne i brižljive ocjene svakog dokaza posebno i svih dokaza zajedno, kao i na osnovu rezultata cjelokupnog postupka.
- (2) FERK na redovnoj sjednici u formi rješenja odobrava potreban prihod koji utvrđuje na osnovu opravdanih troškova obavljanja regulisane djelatnosti, kao i tarife za pojedine djelatnosti u skladu sa odobrenim potrebnim prihodom.
- (3) Rješenje se donosi u pisanom obliku i sadrži obrazloženje osnova za postupanje po svim bitnim pitanjima, pozivajući se na iznesene činjenice i izvedene dokaze u raspravi.“

Član 12.

Član 59. mijenja se i glasi:

„Član 59.
(Donošenje odluke o tarifnim stavovima)

- (1) Nakon donošenja rješenja iz člana 58.a. ovog Pravilnika, FERK posebnom odlukom, na redovnoj sjednici, odobrava i proglašava važećim tarifne stavove za nekvalifikovane (tarifne) kupce i tarifne stavove za korisnike distributivnog sistema.
- (2) FERK može na vlastitu inicijativu pokrenuti analizu primjene tarifnih stavova, te može izmjeniti odluku iz stava (1) ovog člana i proglasiti važećim nove tarifne stavove za nekvalifikovane (tarifne) kupce i tarifne stavove za korisnike distributivnog sistema.
- (3) Tarifni stavovi će biti važeći u roku koji odredi FERK, a u suprotnom isti će se primjenjivati do donošenja nove odluke o tarifnim stavovima.
- (4) Odluka FERK-a, ukoliko FERK drugačije ne odluči, stupa na snagu kad je potpiše predsjednik ili član kojeg on odredi i objavljuje se u Službenim novinama Federacije BiH, a istovremeno se dostavlja stranama u postupku.“

Član 13.

U članu 78. riječ „revizije“ zamjenjuje se riječima „izmjene i dopune“.

Član 14.

U članu 79. iza stava (1) dodaje se novi stav (2) koji glasi:

„(2) Izmjene i dopune ovog pravilnika vrše se po postupku koji važi za njegovo donošenje.“

Član 15

Član 80. mijenja se i glasi:

„Član 80
(Stupanje na snagu)

- (1) Ovaj pravilnik stupa na snagu osmog dana od dana objavljivanja u „Službenim novinama Federacije Bosne i Hercegovine, a isti se objavljuje na oglasnoj tabli i web stranici FERK-a.
- (2) Stupanjem na snagu ovog pravilnika, u skladu sa članom 91. Zakona, prestaju važiti odredbe podzakonskih pravila i propisa koji na teritoriji Federacije BiH regulišu materiju ovog pravilnika.”

Član 16.

Ovaj Pravilnik stupa na snagu osmog dana od dana objavljivanja u „Službenim novinama Federacije BiH“, a isti se objavljuje na web stranici i oglasnoj tabli FERK-a.

Broj: _____
Mostar, 16.03.2010. godine

PREDSJEDNIK FERK-a
Zdenko Šimunović